

INUIT ATAQATIGIIT

Inatsisartuni



6. marts 2017

UPA 2017/184

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Ilanngussaq A-mi saqqummiunneqartut aallaavigalugit Sanaartornermi ilinniartoqarneq pillugu Namminersorlutik Oqartussat Nalunaarutaat nr. 10, 12. juli 2010-meersup nalimmassarneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.
(Inatsisartunut ilaasortaq Bendt B. Kristiansen, Inuit Ataqatigiit)

Tunggavilersuut

Ukiuni kingullerni arlalissuannngortuni sanaartorerup iluani ilinniartunngorusullutik suliffeqarfinni sungiusarfissaaleqisut ajornartorsiutaanerat annertuumik eqqartorneqartarpoq, taamaakkaluortoq annerusumik iluarsiiisutissamik aaqqiisoqassanani.

Taamaammatt Inatsisartut inatsisaanni nr. 11-mi, 2. December 2009-meersumi §35 naapertorlugu sanaartukkani pisortat aningaasaleeqataaffigisaanni piumasaqaatitta nalilersorneqarnissaannut piffissanngortoq isumaqarpunga, taamaaliunngikkutta sungiusarfissaaleqineq malunnaatilimmik iluarsiivigineqarsinnaanngilaq.

Pigineqatigiilluni illuliat namminerlu illuliat minnerpaamik 40 %-ii pisortanit, tassa Namminersorlutik Oqartussanit kommuninillu, aningaasalersorneqartillugit tamanna eqqarsarnarpoq, taamaammallu sanaartornermi sungiusaatigalugu sulisorisat amerlanerunissaannik annertusisamik piumasaqartoqartariaqarpoq. Pisortat taarsigassiisutunik aaqquissuunerit aassinngitsut aqutugalugit sanaartornernut illulioriternernullu aningaasarpassuarnik atuisarput. Taamaattoqarneratalu nalaani inuusuttorpasuit sungiusaatigalugu suliffissaminnik nassaarniapiloortarput. Ajornartorsiullu tamanna ataatsimoorluta aaqqiiviginiartariaqarparput.

Ilisimasagummi imaapput, suliffeqarfeqartoq annertuumik akisussaaqataallutik sungiusartunik sulisoqartartunik, naak peqqussummi piumasaqaatit iluanni sulianik ingerlataqanngikkaluarlutik, illuatungaanni suliffeqarfiit allat sungiusaatigalugu sulisunik ikinnerpaaffissaaniititsisut, naak pisortanik aningaasaliissutit annertuut atorlugit sanaartornerit ingerlakkaluarlugit, tamannalu naapertuilluunngilaq. Suliffeqarfiit pisortat aningaasaleeqataaffigisaannik sanaartortitsisut tamarmik sungiusaatigalugu sulinermik ilinniartoqartariaqarput.

Siuliani allassimasut eqqarsaatigalugit nalilerneqartariaqarpoq inatsimmi pineqartumi neqeroortitsinermi piumasaqaatit sakkukippallaannginersut, sanaartukkammik kr. 3-6 mio. akornanni naleqartillugu taamaallaat sungiusaatigalugu sulisoq ataaseq – uterlara, ataaseq – piumasaqaataavoq, tamannalu annikippallaaqaq. Taamaammallu ilanngussaq 1-imi allassimasut aallaavigalugit Naalakkersuisut nalunaarummik nalimmassaanissaannut piffissanngortoq isumaqarpugut.

Pisorta qarfinnut aningaasaqarnikkut allaffissornikkullu kingunissat

Nalunaarummi nalimmassagassatut kissaatigisat annikitsuinnaanerit pissutigalugu, tamanna Naalackersuisoqarfiup ingerlatsineranut aningaasaliissutit iluanni isumagineqarsinnaasoq naliliutaavoq. Allanguut tamarmiusoq AC-mik akissarsiaqartup ukiumut aningaasarsiaasa annerpaamik qulerarterutai atorlugit pisinnaasoq naliliutaavoq, tassa 50.000 kr.

Aningaasaqarnikkut allaffissornikkullu inuussutissarsiortunut namminersortunut kingunissai

Sanaartornermi suliffeqarfiit pisortat sanaartortitsiniarlutik piumasaqaataanni sukateriffiqeqarpata amerlanerusunillu ilinniartuutitaqartariaqalerlutik. Suliffeqarfiit aningaasartuuteqartussanngussapput ilinniartup suliaqarnerup nalaani ilinniartinneratigut akissarsiaqartinneratigullu. Aningaasartuutaanerusut taakku sanaartornermut akigititamut, qaffanneqartussamut, ivertinneqassapput. Aningaasartuutaanerusut taakku pisortanit inuinnarnillu inissianit pisisunit nammanneqassapput.

Aningaasaqarnikkut allaffissornikkullu innuttaasunut kingunissai

Ilinniartut amerlanerit taamatut periarfissinneqartalerpata, naammassisartut amerleriaateqarsinnaanerit takorloorneqarsinnaavoq. Suliniutikkut kalaallit inuusuttut amerlanerusut sanaatornerup iluani ilinniagaqalernissaat siuarsassavaa. Tamanna ungasinnerusoq isigalugu avataanit suliaortitit ikilinerannik nassataqassaaq. Sanaatornermik inuussutissarsiortornermi akissaatit sulisorisanullu aningaasartuutit pilerinartuupput, taamaammallu manna ungasinnerusoq isigalugu inuusuttatsinnut anguniagaqarfiusunik suliniuteqarfiginerisigut Kalaallit Nunatsinnut aningaasaqarnikkut iluaqusiissaaq.